

նելոյ և նորոգելոյ գրաժին տեղիս 'ի տաճարին Ս. Յարութեան, զի որպէս Տէրութիւնն յայնժամ Յունաց շնորհեաց զհրաման նորոգութեան, գուցէ և այժմ շնորհեացէ Հայոց ջանիւք Ազգապետաց, զի կարի նեղեալ էին 'ի բռնութենէ Յունաց, առաւել 'ի տուգանաց, զի անմարթ էր բեւեռ ինչ հարկանել 'ի տեղի ուրեք. որպէս խորտակեցին ըզմարմարիոն քարն զոր եդին 'ի տեղի Ութաթափման Սուրբ Աստուածածնի 'ի յիշատակ 36 անձանց ծովամոյն եղելոց, (1832. 'ի 23 Օգոստոսի): Իսկրահիմ Փաշա որդի Մեհմէմէտ Ալեայ Փոխարքային եգիպտոսի սաշարեաց զքաղաքն Աքքէ և ետ պատերազմ ընդ Ապտուլլահ Փաշայի, եւ առեալ զքաղաքն եհաս մինչեւ 'ի կողմանս Կուտինայի:

Իսկ Զաքարիա վարդապետ եկեալ յԵրուսաղէմ կարգեցաւ Փոխանորդ Աթոռոյն:

Գարրիէլ Պատրիարք Երուսաղէմի որ նստէր տակաւին 'ի Զմիւռին քաղաք, գրեաց առանձին 'ի Կոստանդինուպօլիս առ Յարութիւն Ամիրայ Պէզճեան, խնդրելով 'ի նմանէ դարձուցանել զինքն յԵրուսաղէմ յԱթոռն, այլ նա խորհրդաբար արար նմա պատասխանի թէ՝ տնօրէնութիւն այդպիսի դործոց անկանի Պատրիարքին և ընդ հանուր ժողովոյ ազգին, և չէր օրէն անձամբ անձին տնօրինել զայդպիսի խնդիր առանց գիտութեան և հաւանութեան նոցին. ուստի պատուիրէ նմա գրել զերիս գիրս, որպէս գրեալ էր առ նա ծածկաբար, առ Պատրիարքն, առ Ժողովս Ամիրայից և առ նոյն ինքն Ճանիկ Ամիրայ, բացայայտ ծանուցանելով 'ի նոսին զխնդիր ճանապարհորդելոյ իւրոյ յԵրուսաղէմ, ոչինչ յիշատակելով զառաջին նամակէն. յայնժամ և մեք ասէ ջանասցուք ըստ բարեխորհուրդ կամաց նոցին տնօրինել զբարին 'ի միւլթարութիւն եւ 'ի սիոփանս ծերութեան ձերոյ:

Ուղեւորեցան 'ի Ս. Էջմիածին Զաքարիա եւ Աբրահամ վարդապետք 'ի ձեռնադրիլ Եպիսկոպոս, և 'ի ճանապարհի պատահեցաւ Աբրահամու հիւանդութիւն կաթուածոյ, յորմէ ծանրացաւ լեզու նորա և խօսէր կապկապելով, և ոչ կարէր համարձակ շարժել զաջ ձեռն իւր. իբրեւ հասին յԷջմիածին, Յովհաննէս Կաթողիկոս Կարբեցի, որ նստաւ յԱթոռ Հայրապետութեան Հայոց (1831), առաքեաց զնա